



ҚАЗАҚСТАН ҰЛТТЫҚ БАНКІ

АҚПАРАТТЫҚ ХАБАР

2017 жылғы 25 қазан

2017 жылғы бірінші жартыжылдықта елдің сыртқы борышының көлемі 4,2 млрд. АҚШ долларына, оның ішінде 2017 жылғы 2-тоқсанда 2,4 млрд. АҚШ долларына ұлғайды – Д. Ақышев

2017 жылғы 1 шілдеде Қазақстан Республикасының сыртқы борышы 167,9 млрд. АҚШ доллары болды, оның 7,9%-ы немесе 13,2 млрд. АҚШ доллары – бұл мемлекеттік сектордың сыртқы борышы, 3,7%-ы немесе 6,2 млрд. АҚШ доллары – «Банктер» секторының сыртқы борышы, 25,2%-ы немесе 42,4 млрд. АҚШ доллары – «Басқа секторлардың» тікелей инвестицияларға байланысты емес берешегі, қалған 63,2%-ы немесе 106,1 млрд. АҚШ доллары осы сектордың фирмааралық берешегін құрайды. Бұл жайлы Қазақстан Республикасы Ұлттық Банкінің Төрағасы бүгін Астана қаласындағы Орталық коммуникациялар қызметінің алаңында өткен баспасөз конференциясында журналистердің сұрақтарына берген жауабында айтып берді.

Д. Ақышев сондай-ақ мемлекеттік сектордың сыртқы борышы, негізінен халықаралық капитал нарығында шығарылған тәуелсіз еурооблигациялар құнының өсуі және бейрезиденттер тарапынан Ұлттық Банктің қысқа мерзімді ноттарына деген сұраныстың артуы есебінен 0,4 млрд. АҚШ долларына өскендігін хабарлады.

«Банктердің» (екінші деңгейдегі банктер және «Қазақстанның Даму банкі» АҚ) сыртқы міндеттемелері» еурооблигацияларды және қолданыстағы қарыздарды жоспарлы өтеу салдарынан 1,0 млрд. АҚШ долларына қысқарды - деп хабарлады қаржы реттеушісінің басшысы.

«Фирмааралық берешек, негізінен мұнай-газ жобаларын бұдан әрі қаржыландыру және тікелей инвесторлар алдындағы төленбеген дивидендтер және қарыздар бойынша сыйақы бойынша берешектің өсуі есебінен 1,8 млрд. АҚШ долларына ұлғайды», - деді Д. Ақышев.

Ұлттық Банк басшысының айтуынша, ішкі жалпы өнімнің (ІЖӨ) және тауарлар мен қызметтер экспорты (ТҚЭ) көлемінің өсуі сыртқы борыштың салыстырмалы түрдегі өлшемдерінің жақсаруына ықпал етеді: 2017 жылғы 1 шілдедегі жағдай бойынша сыртқы борыштың ІЖӨ-ге қатынасы жыл басындағы 119,3%-бен салыстырғанда 112,4%-ды, сыртқы борыштың ТҚЭ қатынасы – 375,8% салыстырғанда 336,6% болды.

«2017 жылғы 1-жартыжылдықта Қазақстанның таза сыртқы борышы ІЖӨ-ге қатысты 27,6%-ды құрай отырып, 3,1 млрд. АҚШ долларына 41,2 млрд. АҚШ долларына дейін ұлғайды» - деп атап өтті қаржы реттеушісінің басшысы, сол сияқты ол мемлекеттік сектор бұрынғыдай қалған әлемге қатысты таза кредитор позициясын, «Басқа секторлар» және «Банктер» секторы – таза борышкер позициясын сақтап отырғандығын айтып өтті.

Ұлттық Банк зейнетақы активтерін басқару жүйесін одан әрі реформалау жөнінде ұсыныстар дайындады – Д. Ақышев

Реформаның мәні салымшыларға зейнетақы жинақтарын инвестициялық басқаруға беру үшін жеке басқарушы компанияларды таңдау құқығын беруден тұрады. Салымшының басқарушы компанияны таңдауды инвестициялық қызмет кірістілігінің, тиімділігінің көрсеткіштерін, сондай-ақ алынатын комиссияның мөлшерін негізге ала отырып жасайтыны болжанады. Бұл туралы Қазақстан Республикасы Ұлттық Банкінің Төрағасы Астана қ. Орталық коммуникациялар қызметінің алаңында өткен баспасөз конференциясында журналистердің сұрақтарына жауап бере отырып айтты.

«Осы реформаның негізгі мақсаты салымшыларды өздерінің жинақтарын басқару процесіне тарту, сондай-ақ зейнетақы активтерін инвестициялық басқару бойынша бәсекелес ортаны құру болып табылады», - деп атап өтті Д. Ақышев.

Қазіргі уақытта бұл ұсыныстар «Қазақстан қаржы ұйымдарының қауымдастығы» ЗТБ алаңында бизнес-қоғамдастықпен талқылануда.

Қазіргі кезде Ұлттық Банк Үкіметпен бірлесіп Қазақстанның криптовалюталар шығаруға және айналысына арналған тәсілдерін әзірлеуде – Д. Ақышев

Осы процестің күрделілігі криптовалюталардың ерекшелігінен тұрады, олардың ұлттықтан жоғары сипаты бар, сондай-ақ кімнің де болмасын, оның ішінде мемлекеттің міндеттемесі немесе кепілдігі болып табылмайды. Бұл туралы Қазақстан Республикасы

Ұлттық Банкінің Төрағасы бүгін Астана қ. Орталық коммуникациялар қызметінің алаңында өткен баспасөз конференциясында журналистердің сұрақтарына жауап бере отырып айтты.

«Криптовалютаның бағасы оған деген сенімге негізделген сұраныспен және ұсыныспен ғана айқындалады. Сондықтан криптовалюталарды кеңінен пайдаланудың жалпы қауіпсіздігіне қатысты бірқатар сұрақтар бар. Қазіргі кезде бір де бір мемлекет цифрлық валюталардың мәнін және оларды пайдалану процесін төлемдік қатынастар шеңберінде және сол сияқты валюталық бақылау, мемлекеттің ақша-кредит саясатына әсер етуі саласында реттеу моделін толық айқындаған жоқ. Криптовалюта бағасының қысқа мерзімді перспективада құбылмалылығының жоғары болуы иесіне алып-сатарлық операциялар жасау кезінде пайда табуға мүмкіндік береді, бірақ одан әрі азаматтардың қаражатын жоғалтудан айтарлықтай шығынға алып келуі мүмкін. Барлық адам мемлекеттің криптовалюталар бойынша нақты құнға және қаражаттың сақталуына кепілдік бере алмайтынын түсінуге тиіс, оларда нақты активтер және заңды міндеттелген тұлғалар түрінде ешқандай қамтамасыз ету жоқ», – деп айтты Ұлттық Банк Төрағасы Д. Ақышев.

Қорытындылай келе, ол алып-сатарлық тәуекел болғандықтан жеке тұлғалардың криптовалюталар бойынша операцияларының шектелуге тиіс екенін атап өтті. Тұтынушылардың құқықтарын қорғау мақсатында қазіргі кезде Ұлттық Банк Үкіметпен бірлесіп криптовалюталарға қатысты ұстанымды қалыптастыру мәселесін пысықтауда.

Данияр Ақышев Банк секторының қаржылық орнықтылығын арттыру бағдарламасын іске асыру барысы туралы айтып берді

Ұлттық Банк қадағалау процесінің, банктердің акционерлермен ортақ үстеме капиталдандырудың тиімділігін арттыруға және банк секторының бәсекеге қабілеттілігін арттыруға бағытталған ҚР банк секторының қаржылық орнықтылығын арттыру бағдарламасын іске асыруда.

Бағдарламаның іске асырылу барысы туралы бүгін журналистерге Астана қаласында Орталық коммуникациялар алаңында өткен баспасөз конференциясы кезінде БАҚ сұрақтарына жауап бере отырып, ҚР Ұлттық Банкінің Төрағасы Данияр Ақышев айтып берді.

Оның айтуынша, Бағдарламада көзделген шаралар банк секторының жинақталған тәуекелдерін шешеді және жаңа тәуекелдердің туындауын көздемейді.

Ол Бағдарламаны іске асыру шеңберінде ағымдағы жылғы қыркүйекте және қазанда Ұлттық Банк Басқармасының Бағдарламаға жалпы сомасы 410 миллиард теңгеге екінші деңгейдегі төрт банктің: «АТФ Банк» АҚ-тың, «Еуразиялық Банк» АҚ-тың,

«Цеснабанк» АҚ-тың және «Банк ЦентрКредит» АҚ-тың қатысуын мақұлдағанын атап өтті. «Көрсетілген банктер және олардың ірі акционерлері қаржылық орнықтылықты арттыру, активтерінің сапасын жақсарту және жұмыс істемейтін кредиттер деңгейін төмендету жөніндегі іс-шаралар жоспарларын, сондай-ақ банкті үстеме капиталдандыру жөніндегі жазбаша міндеттемелерін ұсынды», – деді Д. Ақышев.

Бұл ретте ол банктердің қаржылық орнықтылықты арттыру жөніндегі іс-шаралар жоспарлары белгіленген тәртіппен Ұлттық Банкпен келісілгеннен кейін Ұлттық Банктің еншілес ұйымы – «Қазақстанның орнықтылық қоры» АҚ көрсетілген банктердің реттелген облигацияларын сатып алатынын нақтылады.

«Банктерге қаржылық қолдау көрсету тетігі Бағдарлама операторы Ұлттық Банктің еншілес ұйымы – «Қазақстанның орнықтылық қоры» АҚ-тың 15 жыл ішінде қайтарылатын реттелген борышты беруі арқылы банктердің меншікті капиталына қолдау көрсетуді болжайды. Банктің қаржылық жай-күйі нашарлаған жағдайда, атап айтқанда, ол пруденциялық нормативтерді бұзған немесе активтерді сыртқа шығару фактілері анықталған жағдайда, реттелген борышты жай акцияларға конвертациялау көзделген. Банк көрсетілген міндеттемелерді бұзған жағдайда, оператор қатысушы банк капиталына кіру сияқты соңғы шараны жүзеге асыратын болады», - деді Д. Ақышев.

Бағдарламаны үш негізгі бағыт бойынша іске асыру көзделгенін еске саламыз. Бірінші бағыт – қадағалаушылық ден қоюдың сапасы мен шұғылдығын арттыру үшін реттеу және қадағалау ортасын өзгерту; екіншісі – жүйе құрайтын банктің қаржылық орнықтылығын арттыру; үшіншісі – ірі банктердің қаржылық орнықтылығын арттыру.

Толығырақ ақпаратты мына телефон бойынша алуға болады:

+7 (727) 270 45 85

e-mail: press@nationalbank.kz

www.nationalbank.kz